

BEBERA·ACHISAN MANGMANG TOROMI INE CHANAKO MAN·ANI

Sabbath Attam-July 15

Ia Antini Lessonna Poraiani: *Gal. 2:15–21; Eph. 2:12; Phil. 3:9; Rom. 3:10–20; A·ba. 15:5, 6; Rom. 3:8.*

Mingani Pod: “Kristo baksa anga chisolo datkapako man·aha; angade tanggipa ong·jaha, indiba Kristoan ango tangenga. Aro da·o be·eno angni janggi tanga bebera·ao, chongmotan angna ka·sae angni gimin antangko on·gipa Isolni Depanteko bebera·ao janggi tanga.” (*Galatirangna 2:20*).

An·chingni meja antio nikmanbagimin gita, Paul Antioko Pitorko bebera·atango jotking dakjahani gimin mikkangchakchakan manengaha. Pitorni, skango Kristian ong·gijagipa (*former pagans*) rang baksa cha·jana miksongahaniara uamangara namanio gnigipa gadango ong·gipa Christianrangsa ong·a ine miksongani ong·aha. Uamangba Isolni nokdangni dolo ong·pana sikmanchaode aro table ge·sano cha·rimani patianirangko man·pana inode, uamangara skanggipa bigil rasotchengna nanggenchim ine uni kamrangna mesokaha.

Paulara Pitorna maikomancha ua gisik ding·bemiting somoio aganaha? Ia antini lessono, maia ong·angaha uani gimin an·ching poraigen. Ia bako mitam nangchongmotgipa dondingimin kattarang Niam Gitalo donga, aro ian namen nangchongmotgipa bak ong·a, maina ian an·chingna skanggipa changna Nama Kattani bang·a ja·pang kattarangko uianina aro Paulni Galatirangna mikkangchi chiti seanirangko uina ja·pang ong·a. Ia ja·pang kattaranga bebera·achi toromi ine chanako

man·ani (*justification*), *toromi ong·ani, niamni kamrang, bebera·ani, aro bebera·asan ong·aija indiba Jisuni bebera·animangba.*

Ia kattarangchi Paulara jokatanina miksongani giminara maiko mangsonga, aro uaranga an·chingna maiko skia?

**Sabbath sal July 22na ia antini lessonko namedake poraie taribo.*

Robibar

July 16

**BEBERA·ACHISAN MANGMANG TOROMI INE
CHANANI GIMIN SING·ANI (Gal. 2:15, 16)**

Galati 2:15 o, Paul indake sea, “An·chinga ba·kapon Jihudirang ong·a, Gipin Jatrangoni ong·ja.” Mai miksonganiko uara dakenga ine na·a chanchia?

Paulni kattarangko uina gita, sani aro maini gimin seenga uarangni ja·pangko u·ina nanga. Jihudi Kristianrangko uni uiani ba miksonganiona sokdobaatna gita, Paul uamangni maikoba uigni aro ra·chakna altuakalgipaoni a·bachenga, jekai, Jihudi aro Gipin Jatrangni gisepo atchu·ambioni ong·rikrikbagipa dingtanggrikanioniko. Jihudirangara Isolni seokako man·manchagiparang ong·a, Uni niamchi bil on·ako man·giparang, aro uamang Un baksa songgigrikanio namgnirangko man·giparang ong·achim. Gipin Jatrang, maibakaiba, papirangsa; Isolni niam uamangni cholonko kangrikani dongja, aro uamanga ku·monggrikani ku·rachakani nalsao ong·giparang ong·achim (*Eph. 2:12, Rom. 2:14*). Gipin Jatrangara nikchrakpilen papirang ong·ani gimin, pod 16 o Paulni Jihudi Kristianrangna mikrakatara indake ong·a; chongmotan, uamangni gisik namanirangchi uamangko Isolona ra·chakgnigipa ong·atja, maina darangba “niamni kamrangchi”

toromi chanako man·ja.

Galati 2:16, 17 o Paul toromi kattako changbri jakkala. “Toromi chanako man·ani” ara maiko miksonga? Re·o. 23:7 aro Deut. 25:1 ko chanchibo.

Ia verb bebe ong·ara Paulni agangipa katta ong·a. Ia katta Niam Gitalo chang 39 nakata, uoni chang 37 de Paulni uni chitirango jakkalgipa kattarang ong·a. Ua uko Galatirango chang 8 jakkala, Galati 2:16, 17 o chang 4 bikote mesokani (*reference*) rangko man·chape. *Toromi ine chananiara* courtnei niamrango jakkalgipa aganani ong·a. Uan bichalni raiko on·na, uko rim·e ra·bagipa mandena, bichal ka·gipa ua mandeko dos gri ine aganprakna jakkalgipa katta ong·a. Ian *jegalako man·anina* bikpilgipa katta ong·a. Iana agreba, ua kattarang *bebegipa* aro *toromi* ia minggnian apsan Greek kattaonin re·baa, mandena “bebegipa ine channa” miksonganiara ua mandeko “toromi” ine chanako man·aha. Indake, toromi ine chananiara kema ka·a ba kema watanade maimaja bata; ian ua mandeara toromi ong·a ine namemanchan aganprakani ong·a.

Mitam Jihudi bebera·giparagnade, maibakaiba, toromi ine chanako man·aniara meli·nangrimgrikanichiba ong·achim. Uan uamangni Isol baksa aro Uni ku·monggrikani baksa pangnan nangrimgrikani ong·a. “Toromi ine chanako man·aha” ine aganon, ua mandeara Isolni (Antangni manderang baksa) ku·monggrikano, kakketgipa member ong·a ine chanako man·aha.

Galati 2:15–17 ko poraibo. Paulara nang·na iano maiko aganenga, aro na·ara maikai ia kattarangkoa na·a antangni Kristian ong·e janggi tanganiona jakkalatgen?

NIAMNI KAMRANG

Mandeara “niamni kamrangchi” toromi chanako man·ja ine Galati 2:16 o Paul changgittamna kingking agana. “Niamni kamrang” ine uni aganani miksonganiara mai? Maikai ia podrangara (Gal. 2:16, 17; 3:2, 5, 10; Rom. 3:20, 28) uni ortoko ma·siatna dakchaka?

“Niamni kamrang” ingipako an·ching uina man·na gita, skanggipa an·chingara maiko *niam* ine Paulara aganenga uko uichengna nanga. Ua katta *niam* (*Greeko nomos*)ko Paulni chitirango chang 121 nika. Uko dingtang dingtang obostarangna jakkala: Isolni Uni manderangna namnikaniko, Moseni skanggipa ki·tap kingbongako, Niam Gitcham gimikko, ba ramramarigipa niamko. Maibakaiba, Paulni uko mongsonggipa jakkalani bewalde Isolni chu·gimik ge·etanirangko, jekon ua Uni manderangna Mosechi on·aha, uko aganna jakkala.

“Niamni kamrang” ara iarangko man·gopa: Isolni Mosechi Uni pilak ge·etanirangna nanganirangko – uaranga Ge·eta Mingchikung ba Jisuni re·bana skang dakjagringsoanirang ong·naba donga. Paulni miksonganiara indake ong·a: jeba jedake rakeba Isolni niamrangko ja·rikna joton ka·ja maina, an·chingni namachide Isolna an·chingko toromi ine channa nama chu·ongja, aro uachi an·chingko Isolni mikkango toromi chanjawa. Uan indake ong·a, maina Uni niamara chu·gimik kakket ong·aniko chanchiao ba kamoba ong·na nanga, basakobasan ong·aija indiba pilak somoion, aro mitam uni ge·etanirangnasan ong·aija indiba pilak ge·etanirangon.

“Niamni kamrang,” Niam Gitchamo nakatjaoba aro Niam Gitaloba Paulni seanina agre gipino nikjaoba, uni ortonni namen kakket ong·ani 1947 o nakatbaaha – Jisuni somoio donggipa Essenes minggipa Jihudi dolni seaniko Dead Seoniko

dol·gimin seanirangko man·aoni. Uko Ibri ku·sikchisa sea, aro ua dol·gipao seani katta bichongara *Miqsat Ma'as Ha-Torah* ong·a jekon pe·skaode “Niamni Nangchongmotgipa Kamrang” ine ong·gen. Ua dol·gipa Sastroo bang·a niam on·giparangni gimin talata; jekai, rongtalgiparangko marang nangataoniko champengani, Jihudirangni Gipin Jatrangoni dingtang dongani. Bon·kamao uko segipa indake sea je ia “niamni kamrangko” ja·rikode, nang·ko Isolni mikkango “toromi ine chanako man·gen.” Paul gita ong·gija, ua leka segipa uni poraigiparangna bebera·achisan mangmang toromi ine chanako man·aigen ine aganjaha indiba mandeni kam·cholonosa.

Na·a antangni dake·nike uiao (*experience*), badita name na·ara Isolni niamko rakkia? Na·ara Isolni mikkango nang·ko toromi chanako man·na ine niamko name rakkiana? (*Rom. 3:10–20 ko nibo.*) Nang·ni aganchakanira maikai Paulni iano miksonganiko uiatna dakchakani ong·gen?

Mongolbar

July 18

AN·CHINGKO TOROMI CHANANI JA·PANG

“Uo angko maikai nikgen, niamoni ong·gipa antang torom inako man·gija, indiba Kristoo bebera·achi chong·motan bebera·ani gimin Isolni on·a torom inako man·gen” (*Philipirangna 3:9*).

Jisuo bebera·ania nangchongmota ong·ja ine Jihudi Kristianrang aganenga ine an·ching chanchichipna nangja. Jeba ong·china, uamang gimikan Jisuo bebera·giparang ong·a. Uamang gimikan Uo bebera·a. Uamangni cholonrang, maibakaiba, bebera·animangmangde chu·ongja; bamaniba dongna nanga, maina an·chingni bamania toromi ine chananiko

man·dapata ine uamang uiaha. Toromi ine chananiara minggnichin ong·a – bebera·achiba aro kamrangchiba ine uamang jeraa ra·naba donga. Paulni changni chang Kristoo bebera·aniko niamni kamrang baksa dingtanggrikaniko agantaitaianiaru uni bilake una warachakaniko mesoka. Bebera·a, aro bebera·amangmansan, toromi ine chanani ja·pang ong·a.

Paulnaba bebera·ania gisikomangmang chanchiaianisan ong·aija; indiba ian Jisuo nangrimaniko ra·ronna man·gijagipa bak ong·a. Beben, ia katta dolko changgni “Kristoo bebera·ani” ine Galati 2:16 o pe·ahaniara pilak gipin pe·anirangna bate orto gnangbatgipa ong·a. Greeko ua katta dolko Jisuni “bebera·ani” ba “kakket ong·ani” ine pe·aha. Ia baibai pe·anian, niamni kamrangko an·chingni dakenggipaoniko aro Kristo an·chingni palo maiko dakaha uni gisepo bilakbegipa dingtanggrikaniko Paulni mesokengani ong·a. Ua, Uni kakket aro bebe ong·anichi an·chingna dakaha.

Ian gisik ra·na namen nangchongmotgipa ong·a je bebera·ani antangaride toromi ine chananiona man·atja. An·chingkora an·chingni bebera·achide toromi ine chanatako man·ja indiba Kristoni an·chingna kakket ong·ahanichisa, jekon an·ching uko bebera·achi an·tangtangna kange ra·aha.

Darangni dakna amgijako Kristo dakaha, aro uan: Uasanmangmang Isolna pilakko Uni dakanio kakketgipa ong·a. An·chingni ka·donganiara Kristoni kakket ong·aniosa ong·a, an·chingo ong·ja. Ian gipinrangni gisepo dal·begipa aro nangchongmotbegipa bebe ong·ani ong·a jean Protestant Reformationna wa·alko nakatataha. Ritcha bilsirangna skang Martin Lutherni uko skiprakna a·bachengao gitan uan da·alona kingkingba nangchongmotbegipa ong·e dongenga.

Galati 2:16 o Paul uni ortoko skangni Syriac pe·anio name mesoka: “Mande niamni kamrangoni toromi inako man·ja, indiba Jisu Kristoko bebera·achisa ine uie, an·chingba Jisu

Kristoko bebera·aha, maikai niamni kamrangoni ong·gija Kristoko bebera·achi an·chinga toromi inako man·gen; maina niamni kamrango pilak be·enko toromi injawa.”

Rom. 3:22, 26; Gal. 3:22; Eph. 3:12; aro Phil. 3:9
rangko poraibo. Kosako an·ching maiko poraia, ua aiao inmingipa bebe ong·aniko ia podrangara maikai an·chingko uiatna dakchaka? Kristoni an·chingna kakket ong·ani, Uni Isolna chu·soksrange katta manianichisan mangmang an·chingni jokataniko man·ani ja·pang ong·a?

Budbar

July 19

BEBERA·ANINI BAMANI

Kristianni jangi tangao bebera·anian ja·pang jadir ong·a ine Paul rongtale agana. Iachisa Kristoni an·chingna ku·racharakanirangko an·chingara ka·dongna man·a. Indiba beberaniara maiamanchasa? Uan mai bakrangko man·a?

Ia podranga bebera·anini a·bachengbaani giminara an·chingna maiko skia? A·ba. 15:5, 6; Johan 3:14–16; 2 Kor. 5:14, 15; Gal. 5:6.

Sastroni gita bebegipa bebera·anide pangnan Isolni nangnikani gita dakani gnang. Kakketgipa bebera·aniara ka·tongonisa ong·baa. Uan Isolni namanina mitelpilani aro ka·saani gnang ong·e re·baa. Uni giminsa jensalo Sastro bebera·ani gimin agana, ua bebera·aniara, pangnan, Isol maiko an·chingna a·bachengataha, uni ja·mansa re·baa. Abrahamni obostao, toatna gita, uni bebera·anian Isolni aiao inmingipa ku·rachakanirangna aganchakani ong·a (*A·ba. 15:5, 6*), aro Niam Gitalo Paulni aganani gita, an·chingni bebera·aniara, Kristo an·chingna chisolo maiko dakaha uko (an·chingni) u·iani

bilakahani giminsa ong·a.

Bebera·aniara Isolna aganchakani ong·ode, ua aganchakaniranga mairangko man·chapna nanga? Bebera·ani halchal (*nature*) ni gimin ia podranga maiko agana. Johan 8:32, 36; Wat. 10:43; Rom. 1:5, 8; 6:17; Ibri. 11:6; Jakob 2:19.

Sastroko simsakbee porika ka·e nianio indake nikaha je bebera·ania Isolni gimin u·iaianisan ong·aija indiba uan u·ianiko ra·chakna man·aniba ong·a. Ianasa Isolni noksa (*picture*) ko tik ong·e u·iania namen nangchongmotgipa ong·a. Isolni cholonni gimin ong·gija u·ianiara bebera·na namen man·dikatani ong·a. Kakketgipa bebera·aniara mandeni janggi tanganikoba dingtangata. Rom 1:5 o Paul bebera·anini bamani gimin sea. Paulara bamania bebera·animung apsanaia ine aganjaenga. Kakket bebera·ania mandeni janggi tangao chu·gimik dingtanganiko ra·baa, gisikkosan ong·aija ine ua mangsonga. Uan an·chingni antangtango Gitel Jisu Kristo Jokatgipana on·kanganiko man·chapa. Uni gimin bebera·ania, an·ching maiko daka, maidake janggi tanga, sao an·chinga ka·donga, aro an·ching maiko bebera·a, uan ong·a.

Bristibar

July 20

BEBERA·ANIA PAPKO DE·DOAMA?

Bebera·achisanmangmang toromi chanako manaigen ine Paulni Nama Kattako skiano uko rim·ania, (*uni skiani*) manderangko papko ka·na chol on·ani gita dakaha (*Rom. 3:8, 6:1 ko nibo*). Paulko rim·giparang (*accusers*) ni rim·ani gita, manderanga niamko manina nangjahaode (*aro iako Isolba ra·chakahaode*), indide mainasa manderanga maidake janggi tangna nanga uni gimina aganbekbekna nangkugen? Lutherba ia

apsan matnanganirangkon chagrongaha.

Bebera·achisan mangmang toromi chanako man·aigen ine skianiara papko dakna didiani gita ong·a ine uko rim·anina, Paulara maikai aganchaka? Gal. 2:17, 18.

Paul antangko matnanggiparangko bilakgipa kattachin aganchaka: “Isol beng·a!” Kristoona re·baani ja·mano mande papo ga·akon, ua daitoara Kristoni ong·chongmotjawa. An·ching niamko pe·ode, an·ching antangtangan niamko pe·giparang ong·a.

Maikai Paulara uni Jisu Kristo baksa nangrimaniko talata? Mai cholrangchi ia aganchakania uko bobil dakgiparangni uko matnanganiara, ong·jaha ine sakkiko on·a? Gal. 2:19–21.

Paul uko warachakgiparangni miksonganirangko uamangni kamara ka·dinganisan ong·aia ine uia. Bebera·achi Kristoko ra·chakanikora maiba chonbegipa obosta dake, salgini kamko kal·ake roa gita dake ra·ani ong·ja. Mandeni janggi tangani dingtangujaon Isol mandeko toromi ine chanaha. Kristoko bebera·achi ra·chakaniara namen skanggipa nangchongmotgipa ong·a. Ian chu·gimik Kristo baksa nangrimaniko jeon Uni siani aro chakatpilaniko man·chapa. Gisikni gita aganode, an·chingara Kristo baksa datkapako man·aha, aro an·chingni antangtangna chanchiaiani gitcam bon·atako man·aha ine Paul agana (*Rom. 6:5–14*). An·chinga batanggimin namgijarangko bon·ataha. Pilakan gitalsa ong·aha (*2 Kor. 5:17*). An·chingara Kristoo gital janggi tanganina saldoako man·giparang ong·aha. Salantio an·chingko Ugita ong·batrorobana kamko ka·e, chakatpilgimin Kristo an·chingo tanga.

Kristoo bebera·ania, uni gimin, papna kema pa·sikani

ong·ja indiba ningtubatgipa, a·sal gnanbata Kristo baksa nangrimbatataninasa ong·a.

Niamni kamrang donggija bebera·achisan jokataniko man·a ine chanchianina na·a maikai talatgen? Uan nang·ko on·tisa kenatama, ma papko dakanina kemako man·aigen ine (*na·ara*) uo kusi ong·e donggenma? Jokatanini gimin nang·ni uiani gita aganchakania maikai ong·gen?

Sukrobar

July 21

CHANCHIDAPANINA: “Bebera·achi toromi ine chanako man·ani bidingo manderangni ong·gija chanchie kusi ong·e dongaiiani gimin angna changni chang aro changni changan kengniko agantaitaiahniko anga man·aha. Anga bang·a bilsirangnan iani bidingo Satan manderangko jajaatna dingtangmancha kamko ka·gen ine mesokaha. Bang·an bebera·aoniko ra·rikaha maina jokatanini gimin bringimin, jajaatanirangko toromo dangdike on·giparang ong·gija ra·napbaaha indake manderangni ka·tongrangona sokatjaha ine angna mesokaha.

“Ga·akgimin manderangni antangtangni nambegipa kamrangchi nama inako man·na joton ka·anina agre, namedake kam ka·na nangbatbegipa, agantaitaina nanggipa, ba pilak manderangni gisiko mangrakbate kam ka·na nanggipa *point* ge·saba gri. Jokataniaara Jisu Kristoo bebera·anichisan mangmang ong·a.”—Ellen G. White, *Faith and Works*, pp. 18, 19.

“Niam toromi ong·aniko dabia, aro ia (*niam*)na papi gro nanggipa ong·a, indiba ua uko on·na amgijani ong·a. Mingsa mangmang chol jechin ua uko (*toromi ong·aniko*) man·na amgen uara bebera·anichisan ong·a. Bebera·achi ua Kristoni namaniko, aro Gitel Uni Depanteni bamaniko Isolona ra·bana man·gen. Unon Kristoko papini biapo donatskaa. Kristoni toromi ong·anichi mande chu·sokjahaoba ra·chakako man·aha,

aro Isol indake gisik pilgipa aro bebera·gipa janggiko rimchaksoa, kema ka·a, toromi ine chana, aro Uni Depanteko ka·saa gitan unaba ka·sabea.”—Ellen G. White, *Selected Messages*, book 1, p. 367.

CHANCHIGRIKNA SING·ANIRANG:

1. Kosako janapgiminni skanggipa bako, Ellen G. White bebera·achi toromi ine chanako man·anina agre agantaitaina aro skitaitaina nanggipa subject dongja ine agana. Klasso, uni aganara da·alo an·chingna jakkaltobegipa ong·ama ong·jama chanchigrikbo maina ua uko ritcha bilsirangna skangan semanaha.

2. Protestant Reformation aro Lutherni gimin chanchiatbo. Dingtang dingtang somoirang, biaprang aro obostarang jedakeba ong·china, mainasa million manderangrangni Romni ning·o gisikni nokol ong·aoniko jokatanina Paulni ia bebeko iano on·aniara inditan nangchongmotgipa ong·a?

Agangopani: Antioko Pitorni kamrangara songsarekrang bigil rasotchenggijade kakketgipa Kristianrang ong·bana man·jawa ine ong·aha. Paul uandakgipa ong·gija chanchianiko mesoke on·aha. Isol darang saksakoba mandeni nama kamrango toromi ine aganna man·ja; maina nambatsranggipa manderangmangba chu·soksranggipa ong·ja. Isol, Kristochi an·chingna maiko dakaha uko ra·chakanichisa papirangko Uni nikao toromi ine chanako man·gen.

Davidni Aiao Inmananiko Nikani, Bak 2

Jiksesa Sircarrang (*ian Marak ba Sangma ina gita chatchi ong-a*), uamangba David aro Swarnani re·gipa mondolini apsan memberrang ong·achim. Uamangba uamangni gitalgipa bebeko man·ao aiao inmanaha. “Indakgiparang Sastroo donga ine chinga pangnaba uijachim,” uamang aganaha.

Mingsa uamangni skie ra·aniara, Isol baksa jen somoioba bi·achi agangrikna man·aia, kamal nangja aro bi·ani ki·tapkoba nangja. Ia koborran uamangko aiao inmanataha, maina uamang basakoninba Isol baksa direct agangrikna sikbeengjokchim.

Walsao uamangni demechik bilsa 13 ong·gipa ka·tong sabeana grapbeaha. Uni ka·tong saan saaha, namkalgija. Uni gogorengani aro grapani ma·a·paako jajrengatbeaha.

“An·ching maiko dakgnok?” Mrs. Sircar jajrengaha. “Da·o sam ra·enaba man·jawa, pringona sengoara siskagnok.”

“An·ching una bi·na man·gen,” uni segipa aganaha. “Bi·na gita chingara kamalko nangja ine chinga skie ra·manaha; chinga obstako Jisuna aganaigen – uko an·sengatchina gita.”

Ua jiksesa ua sabeenggipa me·chik bi·sani palangsamo ja·sku dipane Isolna grape, uamangni demechikko jokatchina bi·aha. Uamangni gamchatbegipa demechikko dangtapchina Uo mol·molon, uamangni perang gita mikchirang jo·olbaaha.

Rang·sanan uamang uamangni demechikni gogorengaoni dontongako nikaha. Uamang “Amen” inarion ua tusiaha. Uni ma·a·paarang Isolsa uamangko David Panni noko Bibleko poraina gita dilaha ine bebera·aha. Uamang uno dongangkuna (*attend ka·angkuna*) miksongaha, aro uamangan dolsa napolchenggiparanga ong·aha.

Uamangni song sambao saksa mande Victor minggipa aro uni jikgipa, saoba uamangona re·bae Baibleko u·ina gita skie

on·eodechim ine Isolo bi·rongengachim.

Unikode salsao saoba uamang jiksesako David aro Swarnani noko Bibleko poraiaona re·bachina okamataha. Victor aro uni jikgipa uamangni bi·anina Isolan ua *visitorko* uamangona watataha ine bebera·aha. Sonibar sal sokahaon Victor aro uni jikgipa Davidni nokona re·angha. “Aiao inmanani!” Victor indake knatimengon ua indake agandapaha: “Anga sing·anirangna Sastroni aganchakanirangko man·enga, iarangni gimin anga bang·a bilsirangna dakgrikbeengahachim. Anga da·o kusi ong·bejok.”

Ua katta bakbakan ua jolo donggipa songrangona gipangaha. Manderang uamangni nokona re·bae re·bae uamangni do·gako doktikeaha. Uamang maiko skia man·aha uko uamangni songona re·ange skieskachina gita uamang aganangbeaha.

Adita bilsirang re·angaha, David aro Swarna Global Mission Pioneer training classo napaha aro indake sak 20 Global Mission Pioneerrangoni saksa ong·baaha. Ua dol (*team*) ko Nama Katta baksa jillarangchi aro songadamrangchi watataha. Indakani a·sel, hajal manderang bebeko uina man·aha aro Jisuo napbolaha.
